


Presentacion di buki Topa TULA na Biblioteca Nacional



ORANJESTAD- Biblioteca Nacional Aruba a ricibi un ehemplar di e buki Topa TULA. E presentacion a tuma luga recientemente. Olga Orman hunto cu Giselle Ecury a percura pa e produccion di e buki Topa TULA, trahando cu Fundacion Simia Literario na Hulanda. Den e buki Topa TULA, produci pa Fundacion Simia Literario tin contribucion di varios autor y poeta conoci di Aruba y Corsou. Fundacion Simia Literario a lansa un proyecto special y a pidi diferente poeta pa construi un encuentro literario entre Tula y e generacion di awor. Esaki basa riba inspiracion di e storia di Tula. Asina den poemanan cortico tin un combersacion andando entre Tula y e generacion di awor tocante temanan manera libertad y igualdad. Poesia ta e expresion di emocion den palabra. Poesia ta manera musica sin zonido. E tin un tradicion largo den cultura Antiano cu ta bay bek den tempo di Banderitanan, poemanan cortico y skerpi cu tabata vocifera e comentario social di e tempo aya. Asina por lesa riba e portada. Cu atencion pa loke e poetanan kier a expresa y den e forma di nan escogencia, sin toca e nificacion autentico y sentimentonan, Giselle Ecury hunto cu Olga Orman a percura pa e traduccion di Topa Tula. Esaki bou di e lema “E autor/poeta semper tin e ultimo palabra”. Poetanan cu a contribui na Topa Tula nan ta: Laurindo Andrea, Hilli Arduin, Frida Domacassé, Giselle Ecury, Eugénie Herlaar, Alida Kock, Gerarda Lauf, Joan Leslie, Charlton Marcos, T. Martinus, Gabriel Mitchell Murray, Quito Nicolaas, Olga Orman, Walter Palm, Libèrta Rosario y Wendela de Vries.